

詞學小叢書之一

謝秋萍編

唐五代詞選

子愷題

詞學小叢書之一——謝秋萍編

唐五代詞選

上海教育書店發行

版一第後利勝月一十年五十三國民

一之書叢小學詞
選詞代五唐

價定

究必印翻 有所權版

編輯者：謝秋萍

出版者：文力出版社

印刷者：辛利印刷所

發行所：教育書店

（本店參加聯營書店）

上海福州路東華里

分發行：聯營書店

重慶成都

漢口西安

小序

清末的詞家馮煦說：『詞有唐五代，猶文之先秦諸子，詩之漢魏樂府也。近世學者，祖尚南渡，天水而上，罕或及之，殆文禰唐宋八家，而祧東西京，詩學黃培翁，而不知有蘇李十九首，可謂善學乎？』馮氏作詞，是主唐五代者。我們雖不贊成如馮氏的一步一趨去模擬唐五代詞，然唐五代的詞確是詞史上一個最重要的時期，這是誰也不能否認的。

唐五代是詞的草創時代，在這個時代的作家，是負著開闢詞壇的責任的。他們沒有先進的典型作品來模擬，只好自己去經營，只好各人去絞各人的心血來寫詞，所以寫出來的都是不相師承而有個性的作品。他們這種匠心獨運創製出來的作品，竟然把許多老詩人苦心模練出來的詩歌打倒了。許多老作家苦心做成的詩，老是費力不討好，而信手拈來的詞，却往往晶瑩可愛。這樣下去，便逐漸把詩歌的勢力摧毀了，在文壇裏面樹起詞體的新勢力來。所謂唐五代詞，便是詞體所表現的最初的成績。

我們常常聽着說：宋詞是詞的黃金時代。這並不是說宋詞是超越乎一切的，只是說宋詞是最發展的時期。就作品的價值而論，我們只能說宋以後的詞不如宋以前的詞，却不能說唐五代詞不如宋詞。

唐五代是小詞的時期，他們的小詞大都是寫來應歌的，故多言情之作。所謂『詞爲豔科』的話，便是指這時期的作品而言。我們雖覺這個時期的作風，稍嫌狹隘，缺乏深刻的描寫。但值此創造時期，自亦不能期望其各方面均有登峯造極的成就。若僅言體物抒情的小令，則唐五代時期的詞已儘夠我們

吟詠了。

編者，二三，四，一。

目次

無名氏三首	一
張志和二首	二
韓翃一首	三
韋應物二首	三
王建一首	四
戴叔倫一首	五
劉禹錫三首	五
白居易五首	六

劉長卿一首	八
鄭符一首	九
段成式一首	九
張希復一首	九
溫庭筠二十六首	一〇
皇甫松三首	一〇
司空圖一首	一一
韓偓一首	一一
張曙一首	一一
韋莊二十二首	一二

牛嶠八首	三
毛文錫七首	三
和凝四首	三
牛希濟三首	四
薛昭蘊七首	四
顧夔十二首	四
鹿虔扈二首	四
魏承班二首	五
尹鶚三首	五
毛熙震六首	五

李珣二十六首	五
歐陽炯九首	六
歐陽彬一首	六
閻選一首	六
孫光憲十七首	七
張泌十首	七
馮延巳五十二首	八
徐昌圖一首	一〇一
呂巖一首	一〇三
耿玉真一首	一〇三
無名氏二首	一〇三

無名氏此三首舊題李白作

菩薩蠻

平林漠漠煙如織，寒山一帶傷心碧。暝色入高樓，
有人樓上愁。玉階空佇立，宿鳥歸飛急。何處是
歸程？長亭更短亭。

憶秦娥

簫聲咽，秦娥夢斷秦樓月。秦樓月，年年柳色，霸
陵傷別。樂遊原上清秋節，咸陽古道音塵絕。音
塵絕，西風殘照，漢家陵闕。

清平樂

煙深水闊，音信無由達。惟有碧天雲外月，偏照懸離別。盡日感事傷懷，愁眉似鎖難開。夜夜長留半被，待君魂夢歸來。

張志和

漁父

西塞山前白鷺飛，桃花流水鱖魚肥。青箬笠，綠蓑衣，斜風細雨不須歸。

又

松江蟹舍主人歡，菰飯蓴羹亦共餐。
楓葉落，荻花乾，醉宿漁舟不覺寒。

韓翃

章臺柳

章臺柳，章臺柳，往日依依今在否？
縱使長條似舊垂，也應攀折他人手。

韋應物

調笑令

胡馬胡馬，遠放燕支山下。跑沙跑雪獨嘶，東望西望路迷。迷路，迷路，邊草無窮日暮。

又

河漢河漢，曉挂秋城漫漫。愁人起望相思，塞北江南別離。離別，離別，河漢雖同路絕。

王建

調笑令

團扇團扇，美人並來遮面。玉顏顛顛三年，誰復商量管弦？管弦，管弦，春草昭陽路斷。

戴叔倫

調笑令

邊草邊草，邊草盡來兵老。山南山北雪晴，千里萬里月明。明月，明月，胡笳一聲愁絕。

劉禹錫

憶江南

春去也，多謝洛城人。弱柳從風疑舉袂，叢蘭裊露似霑巾，獨坐亦含嚬。

瀟湘神

湘水流，湘水流，九疑雲物至今愁。若問二妃何處
所？零陵芳草露中秋。

又

斑竹枝，斑竹枝，淚痕點點寄相思。楚客欲聽瑤瑟
怨，瀟湘深夜月明時。

白居易

花非花

花非花，霧非霧，夜半來，天明去。來如春夢不多

時，去似朝雲無覓處。

憶江南

江南好，風景舊曾諳。日出江花紅勝火，春來江水綠如藍，能不憶江南？

又

江南憶，最憶是杭州：山寺月中尋桂子，郡亭枕上看潮頭。何日更重遊？

又

江南憶，其次憶吳宮：吳酒一杯春竹葉，吳娃雙舞醉芙蓉。早晚得相逢。

長相思

| 汴水流，泗水流，流到瓜洲古渡頭，吳山點點愁。
| 思悠悠，恨悠悠，恨到歸時方始休。月明人倚樓。

劉長卿

講仙怨

晴川落日初低，惆悵孤舟解攜，鳥向平蕪遠近，人
隨流水東西。白雲千里萬里，明月前溪後溪。獨
恨長沙謫去，江潭春草萋萋。

鄭符

閑中好

閑中好，盡日松爲侶。此趣人不知，輕風度僧語。

段成式

閑中好

閑中好，塵務不縈心，坐對當窗木，看移三面陰。

張希復

閑中好

閑中好，幽磬度聲遲。卷上論題肇，畫中僧姓支，

溫庭筠

南歌子

似帶如絲柳，團酥握雪花，簾卷玉鉤斜。九衢塵欲
暮，逐香車。

又

倭墮低梳髻，連娟細掃眉。終日兩相思。爲君憔悴
盡，百花時。

荷葉杯

楚女欲歸南浦，朝雨濕愁紅。小船搖漾入花裏，波起，隔西風。

憶江南

梳洗罷，獨倚望江樓。過盡千帆皆不是。斜暉脈脈水悠悠，腸斷白蘋洲。

蕃女怨

磧南沙上驚雁起，飛雪千里。玉連環，金鏃箭，年年征戰。畫樓離恨錦屏空，杏花紅。

酒泉子

楚女不歸，樓枕小河春水。月孤明，風又起，杏花

稀。玉釵斜篸雲鬟重，裙上金縷鳳。八行書，千里夢，雁南飛。

玉蝴蝶

秋風淒切傷離，行客未歸時。塞外草先衰，江南雁到遲。芙蓉凋嫩臉，楊柳墮新眉。搖落使人悲，斷腸誰得知！

菩薩蠻

小山重疊金明滅，鬢雲欲度香顚雪。嬾起畫蛾眉，弄妝梳洗遲。照花前後鏡，花面交相映。新帖繡羅襦，雙雙金鷓鴣。

又

杏花含露團香雪，綠楊陌上多離別。燈在月朧明，
覺來聞曉鶯。玉鉤褰翠幕，妝淺舊眉薄。春夢正闌
情，鏡中蟬鬢輕。

又

玉樓明月長相憶，柳絲嫋娜春無力。門外草萋萋，
送君聞馬嘶。畫羅金翡翠，香燭銷成淚。花落子
規啼，綠窗殘夢迷。

又

鳳皇相對盤金縷，牡丹一夜經微雨。明鏡照新妝，

鬢輕雙臉長。畫樓相望久，闌外垂絲柳。音信不歸來，社前雙燕回。

又

牡丹花謝鶯聲歇，綠楊滿院中庭月。相憶夢難成，背窗燈半明。翠鈿金壓臉，寂寞香閨掩。人遠淚闌干，燕飛春又殘。

又

滿宮明月梨花白，故人萬里關山隔。金雁一雙飛，淚痕霑繡衣。小園芳草綠，家住越溪曲。楊柳色依依，燕歸君不歸。

又

寶函鈿雀金鸂鶒，沈香閣上吳山碧。楊柳又如絲，
驛橋春雨時。畫樓音信斷，芳草江南岸。鸞鏡與
花枝，此情誰得知？

又

南園滿地堆輕絮，愁聞一霎清明雨。雨後卻斜陽，
杏花零落香。無言勻睡臉，枕上屏山掩。時節欲
黃昏，無慘獨倚門。

又

夜來皓月纔當午，重簾悄悄無人語。深處麝煙長，

臥時留薄妝。當年還自惜，往事那堪憶。花露月
明殘，錦衾知曉寒。

又

雨晴夜合玲瓏日，萬枝香嫋紅絲拂。閑夢憶金堂，
滿庭萱草長。繡簾垂絮毳，眉黛遠山綠。春水渡
溪橋，凭闌魂欲消。

又

竹風輕動庭除冷，珠簾月上玲瓏影。山枕隱濃妝，
綠檀金鳳皇。兩蛾愁黛淺，故國吳宮遠。春恨正
關情，畫樓殘點聲。

清平樂

洛陽愁絕，楊柳花飄雪。終日行人爭攀折，橋下水
流嗚咽。上馬爭勸離觴，南浦鴛聲斷腸。愁殺平原
年少，回首揮淚千行。

更漏子

柳絲長，春雨細，花外漏聲迢遞。驚塞雁，起城烏，
畫屏金鷓鴣。香霧薄，透簾幕。惆悵謝家池閣。紅
燭背，繡簾垂，夢長君不知。

又

星斗稀，鐘鼓歇，簾外曉鷺殘月。蘭露重，柳風斜，

滿庭堆落花。虛閣上，倚闌望，還似去年惆悵。
春欲暮，思無窮，舊歡如夢中。

又

相見稀，相憶久，眉淺澹煙如柳。垂翠幕，結同心，
待郎熏繡衾。城上月，白如雪，蟬鬢美人愁絕。
宮樹暗，鵲橋橫，玉籤初報明。

又

玉爐香，紅蠟淚，偏照畫堂秋思。眉翠薄，鬢雲
殘，夜長衾枕寒。梧桐樹，三更雨，不道離情正
苦。一葉葉，一聲聲，空階滴到明。

河濱神

孤廟對寒潮，西陵風雨瀟瀟。謝娘惆悵倚闌橈，淚
流玉筍千條。暮天愁聽思歸樂，早梅香滿山郭。
回首兩情蕭索，離魂何處飄泊？

河傳

湖上，閑望，雨蕭蕭。煙浦花橋，路遙。謝娘翠蛾
愁不銷，終朝，夢魂迷晚潮。蕩子天涯歸權遠，春
已晚，鴛語空腸斷。若邪溪，溪水西，柳隄，不聞
郎馬嘶。

木蘭花

家臨長信往來道，乳燕雙雙拂煙草。油壁車輕金犢肥，流蘇帳曉春雞早。籠中嬌鳥暖猶睡，簾外落花閑不掃。衰桃一樹近前池，似惜容顏鏡中老。

皇甫松

摘得新

酌一卮，須教玉笛吹。錦筵紅蠟燭，莫來遲。繁紅一夜經風雨，是空枝。

憶江南

蘭燼落，屏上暗紅蕉。閑夢江南梅熟日，夜船吹笛

雨瀟瀟，人語驛邊橋。

又

樓上寢，殘月下簾旌。夢見秣陵惆悵事，桃花柳絮滿江城，雙鬢坐吹笙。

司空圖

酒泉子

買得杏花，十載歸來方始坼。假山西畔藥闌東，滿
枝紅。旋開旋落旋成空，白髮多情人更惜。黃昏
把酒祝東風，且從容。

韓偓

生查子

侍女動妝奩，故故驚人睡。那知本未眠，背面偷垂淚。嬾卸鳳皇釵，羞入鴛鴦被。時復見殘燈，和煙墜金穗。

張曙

浣溪沙

枕障熏爐隔繡帷，二年終日苦相思，杏花明月始應

知。天上人間何處去，舊歡新夢覺來時，黃昏微
雨畫簾垂。

韋莊

天仙子

蟾采霜華夜不分，天外鴻聲枕上聞，繡衾香冷嬾重
熏。人寂寂，葉紛紛，纔睡依前夢見君。

定西番

挑盡金燈紅燼，人灼灼，漏遲遲，未眠時。斜倚銀
屏無語，閑愁上翠眉。悶殺梧桐殘雨，滴相思。

思帝鄉

雲鬢墜，鳳釵垂，鬢墜釵垂，無力枕函敲。翡翠屏深，月落漏依依。說盡人間天上，兩心知。

浣溪沙

夜夜相思更漏殘，傷心明月凭闌干，想君思我錦衾寒。咫尺畫堂深似海，憶來惟把舊書看，幾時攜手入長安？

歸國遙

春欲暮，滿地落花紅帶雨。惆悵玉籠鸚鵡，單棲無伴侶。南望去程何許？問花花不語。早晚得同歸。

去，恨無雙翠羽。

又

金翡翠，爲我南飛傳我意。罨畫橋邊春水，幾年花
下醉。別後只知相愧，淚珠難遠寄。羅幕繡幃鴛
被，舊歡如夢裏。

菩薩蠻

紅樓別夜堪惆悵，香燈半卷流蘇帳。殘月出門時，
美人和淚辭。琵琶金翠羽，弦上黃鶯語。勸我早
歸家，綠窗人似花。

又

人人盡說江南好，遊人只合江南老。春水碧於天，
畫船聽雨眠。壩邊人似月，皓腕凝雙雪。未老莫
還鄉，還鄉須斷腸。

又

如今卻憶江南樂，當時年少春衫薄。騎馬倚斜橋，
滿樓紅袖招。翠屏金屈曲，醉入花叢宿。此度見
花枝，白頭誓不歸。

又

洛陽城裏春光好，洛陽才子他鄉老。柳暗魏王隄，
此時心轉迷。桃花春水綠，水上鴛鴦浴。凝恨對

殘暉，憶君君不知。

更漏子

鐘鼓寒，樓閣暝，月照古桐金井。深院閉，小庭空，落花香露紅。煙柳重，春霧薄，燈背水窗高閣。閑倚戶，暗霑衣，待郎郎不歸。

謁金門

春雨足，染就一溪新綠。柳外飛來雙羽玉，弄晴相對浴。樓外翠簾高軸，倚遍闌干幾曲。雲淡水平煙樹簇，寸心千里目。

空相憶，無計得傳消息。天上嫦娥人不識，寄書何處覓？新睡覺，來無力，不忍把君書跡。滿院落花春寂寂，斷腸芳草碧。

清平樂

春愁南陌，故國音書隔。細雨霏霏梨花白，燕拂畫簾金額。盡日相望王孫，塵滿衣上淚痕。誰向橋邊吹笛，駐馬西望銷魂。

又

野花芳草，寂寞關山道。柳吐金絲鶯語早，惆悵香閨暗老。羅帶悔結同心，獨凭朱闌思深。夢覺半

牀斜月，小窗風觸鳴琴。

應天長

綠槐陰裏黃鶯語，深院無人春晝午。畫簾垂，金鳳舞，寂寞繡屏香一炷。碧天雲，無定處，空有夢魂來去。夜夜綠窗風雨，斷腸君信否？

又

別來半歲音書絕，一寸離腸千萬結。難相見，易相別，又是玉樓花似雪。暗相思，無處說，惆悵夜來煙月。想得此時情切，淚霑紅袖黠。

荷葉杯

絕代佳人難得，傾國，花下見無期。一雙愁黛遠山眉，不忍更思惟。閑掩翠屏金鳳，殘夢，羅幕畫堂空。碧天無路信難通，惆悵舊房櫳。

又

記得那年花下，深夜，初識謝娘時：水堂西面畫簾垂，攜手暗相期。惆悵曉鶯殘月，相別，從此隔音塵。如今俱是異鄉人，相見更無因。

木蘭花

獨上小樓春欲暮，愁望玉關芳草路。消息斷，不逢人，卻斂細眉歸繡戶。坐看落花空歎息，羅袂溼

班紅淚滴。千山萬水不曾行，魂夢欲教何處覓？

小重山

一閉昭陽春又春，夜寒宮漏永，夢君恩。臥思陳事
暗消魂。羅衣濕，紅袂有嗁痕。歌吹隔重闌，遶
庭芳草綠，倚長門。萬般惆悵向誰論？凝情立，宮
殿欲黃昏。

望遠行

欲別無言倚畫屏，含恨暗傷情。謝家庭樹錦雞鳴，
殘月落邊城。人欲別，馬頻嘶，綠槐千里長隄。
出門芳草路萋萋，雲雨別來易東西。不忍別君後，

卻人舊香闌。

牛嶠

江城子

鷓鴣飛起郡城東，碧江空，半灘風，越王宮殿，蘋
葉藕花中。簾卷水樓魚浪起，千片雪，雨濛濛。

又

極浦煙消水鳥飛，離筵分手時，送金卮。渡口楊花，
狂雪任風吹。日暮空江波浪急，芳草岸，柳如絲。

定西番

紫塞月明千里，金甲冷，戍樓寒，夢長安。鄉思
望中天闊，漏殘星亦殘。畫角數聲嗚咽，雪漫漫。

望江怨

東風急，惜別花時手頻執。羅幃愁獨入。馬嘶殘雨
春燕澀，倚門立。寄語薄情郎，粉香和淚泣。

菩薩蠻

舞裙香暝金泥鳳，畫梁語燕驚殘夢。門外柳花飛，
玉郎猶未歸。愁勻紅粉淚，眉翦春山翠。何處是遼
陽，錦屏春晝長。

又

綠雲鬢上飛金雀，愁眉斂翠春煙薄。香閣掩芙蓉，
畫屏山幾重。窗寒天欲曙，猶結同心苴。啼粉澹
羅衣，問郎何日歸？

更漏子

南浦情，紅粉淚，爭奈兩人深意。低翠黛，卷征
衣，馬嘶霜葉飛。招手別，寸腸結，還是去年時
節。書託雁，夢歸來，覺來江月斜。

應天長

玉樓春望晴煙滅，舞衫斜卷金條脫。黃鸝嬌轉聲初
歇，杏花飄盡龍山雪。鳳釵低赴節，筵上王孫愁

絕。鴛鴦對銜羅結，兩情深夜月。

毛文錫

醉花間

休相問，怕相問，相問還添恨。春水滿塘生，鷓鴣
還相趁。昨夜雨霏霏，臨明寒一陣。偏憶戍樓人，
久絕邊庭信。

又

深相憶，莫相憶，相憶情難極。銀漢是紅牆，一帶
遙相隔。金盤珠露滴，兩岸榆花白。風搖玉佩清，

今夕爲何夕？

更漏子

春夜闌，春恨切，花外子規啼月。人不見，夢難憑，
紅紗一點燈。偏怨別，是芳節，庭下丁香千結。
宵霧散，曉霞暉，梁間雙燕飛。

虞美人

鴛鴦對浴銀塘暖，水面蒲梢短。垂楊低拂麴塵波，
蛛絲結網，露珠多滴圓荷。遙思桃葉吳江碧，便是
天河隔。錦鱗紅鬣影沈沈，相思空有夢相尋，意難
任。

又

寶檀金縷鴛鴦枕，綬帶盤宮錦。夕陽低映小窗明，
南園綠樹語鶯鶯，夢難成。玉爐香煖頻添炷，滿
地飄輕絮。珠簾不卷度沈煙，庭前閑立畫鞦韆，豔
陽天。

臨江仙

暮蟬聲盡落斜陽，銀蟾影挂瀟湘。黃陵廟側水茫茫。
楚山紅樹，煙雨隔高唐。岸泊漁燈風颭碎，白蘋
遠散濃香。靈娥鼓瑟韻清商，朱弦淒切，雲散碧天
長。

甘州遍

秋風緊，平磧雁行低，陣雲齊。蕭蕭颯颯，邊聲四起，愁聞戍角與征鼙。青冢北，黑山西，沙飛聚散無定，往往路人迷。鐵衣冷戰，馬血霑臄，破蕃奚。鳳皇詔下，步步躡丹梯。

和凝

漁父

白芷汀寒立鷺鷥，蘋風輕翦浪花時。煙蘿霧，日遲遲，香引芙蓉惹釣絲。

薄命女

天欲曉，宮漏穿花聲繚繞，窗裏星光少。冷露寒
侵帳額，殘月光沈樹杪。夢斷錦幃空悄悄，彊起愁
眉小。

春光好

蘋葉輕，杏花明，畫船輕。雙浴鴛鴦出綠汀，櫂歌
聲。春水無風無浪，春天半雨半晴。紅粉相隨南
浦晚，幾含情。

喜遷鶯

曉月墮，宿雲披，銀燭錦屏帷。建章鐘動玉繩低，

宮漏出花遲。春態淺，來雙燕，紅日漸長一綫。
嚴妝欲罷，嚙黃鸝，飛上萬年枝。

牛希濟

生查子

春山煙欲收，天澹星稀小。殘月臉邊明，別淚臨清曉。
語已多，情未了。回首猶重道：記得綠羅裙，處處憐芳草。

又

新月曲如眉，未有團圓意。紅豆不堪看，滿眼相思

淚。終日劈桃穰，人在心兒裏。兩朵隔牆花，早晚成連理。

謁金門

秋已暮，重疊關山岐路。嘶馬搖鞭何處去，曉禽霜滿樹。夢斷禁城鐘鼓，淚滴枕檀無數。一點凝紅和薄霧，翠蛾愁不語。

薛昭蘊

相見歡

羅襦繡袂香紅，畫堂中，細草平沙，蕃馬小屏風。

卷羅幕，凭妝閣，思無窮。暮雨輕煙，魂斷隔簾櫳。

浣溪沙

粉上依稀有淚痕，郡庭花落欲黃昏，遠情深恨與誰論？記得去年寒食日，延秋門外卓金輪，日斜人散暗銷魂。

又

握手河橋柳似金，蜂須輕惹百花心，薰風蘭思寄清琴。意滿便同春水滿，情深還似酒杯深，楚煙湘月兩沈沈。

又

江館清秋纜客船，故人相送夜開筵，麝煙蘭燄簇花
鈿。正是斷魂迷楚雨，不堪離恨咽湘弦，月高霜
白水連天。

謁金門

春滿院，疊損羅衣金綫。睡覺水精簾未卷，簾前雙
語燕。斜掩金鋪一扇，滿地落花千片。早是相思
腸欲斷，忍教頻夢見。

小重山

春到長門春草青，玉階華露滴，月朧明。東風吹斷

紫簫聲，宮漏促，簾外曉唳鷓。愁極夢難成，紅
妝流宿淚，不勝情。手按裙帶遶花行。思君切，羅
幌暗塵生。

又

秋到長門秋草黃，畫梁雙燕去，出宮牆。玉簫無復
理霓裳。金蟬墜，鸞鏡掩休妝。憶昔在昭陽，舞衣
紅綬帶，繡鴛鴦。至今猶惹御爐香。魂夢斷，愁聽
漏更長。

顧夔

荷葉杯

夜久歌聲怨咽，殘月，菊冷露微微。看看濕透縷金衣，歸摩歸，歸摩歸？

又

一去又乖期信，春盡，滿院長莓苔。手按裙帶獨裴回。來摩來，來摩來？

訴衷情

香滅簾垂春漏永，整鴛衾，羅帶重，雙鳳縷黃金。窗外月光臨，沈沈。斷腸無處尋，負春心。

楊柳枝

秋夜香閨思寂寥，漏迢迢。鴛幃羅幌麝煙銷，燭
光搖。正憶玉郎遊蕩去，無尋處。更聞簾外雨瀟
瀟，滴芭蕉。

醉公子

漠漠秋雲澹，紅藕香侵檻。枕倚小山屏，金鋪向晚
扃。睡起橫波慢，獨望情何限。衰柳數聲蟬，魂
銷似去年。

又

岸柳垂金綫，雨晴鶯百轉。家住綠楊邊，往來多少
年。馬嘶芳草遠，高樓簾半卷。斂袖翠蛾攢，相

逢爾許難。

浣溪沙

紅藕香寒翠渚平，月籠虛閣夜蛩清，塞鴻驚夢兩牽情。
寶帳玉爐殘麝冷，羅衣金縷暗塵生，小窗孤燭淚縱橫。

又

雲澹風高葉亂飛，小庭寒雨綠苔微，深閨人靜掩屏帷。
粉黛暗愁金帶枕，鴛鴦空繞畫羅衣，那堪孤負不思歸。

河傳

燕颺晴景，小窗屏暖，鴛鴦交頸。菱花掩卻翠鬟，
慵整，海棠簾外影。繡幃香斷金鸂鶒，無消息，
心事空相憶。倚東風，春正濃，愁紅，淚痕衣上
重。

又

櫂舉舟去，波光渺渺，不知何處。岸花汀草共依
依，雨微，鷓鴣相逐飛。天涯離恨江聲咽，嗚咽
切。此意向誰說？倚蘭橈，獨無憀，魂銷，小爐香
欲焦。

木蘭花

月照玉樓春漏促，颯颯風搖庭砌竹。夢驚鴛被覺來時，何處管弦聲斷續。惆悵少年遊冶去，枕上兩蛾攢細綠。曉鶯簾外語花枝，背帳猶殘紅蠟燭。

臨江仙

碧染長空池似鏡，倚樓閑望凝情。滿衣紅藕細香清。象牀珍簟，山障掩，玉琴橫。暗想昔時歡笑事，如今贏得愁生。博山爐暖澹煙輕。蟬吟人靜，殘日傍小窗明。

鹿虔良

臨江仙

金鎖重門荒苑靜，綺窗愁對秋空。翠華一去寂無蹤。玉樓歌吹，聲斷已隨風。煙月不知人事改，夜闌還照深宮。藕花相向野塘中，暗傷亡國，清露泣香紅。

又

無賴曉鶯驚夢斷，起來殘酒初醒。映窗絲柳嬾煙青。翠簾慵卷，約砌杏花零。一自玉郎遊冶去，蓮凋月慘儀形。暮天微雨灑閑庭。手按裙帶，無語倚雲屏。

魏承班

生查子

煙雨晚晴天，零落花無語。難話此時心，梁燕雙來去。
琴韻對薰風，有恨和情撫。腸斷斷弦頻，淚滴黃金縷。

謁金門

煙水闊，人值清明時節。雨細花零鶯語切，愁腸千萬結。
雁去音徽斷絕，有恨欲憑誰說。無事傷心猶不徹，春時容易別。

尹鶚

菩薩蠻

隴雲暗合秋天白，俯窗獨坐窺煙陌。樓際角重吹，黃昏方醉歸。荒唐難共語，明日還應去。上馬出門時，金鞭莫與伊。

滿宮花

月沈沈，人悄悄，一炷後庭香嫋。風流帝子不歸來，滿地禁花慵掃。離恨多，相見少，何處醉迷三島。漏清宮樹子規嘯，愁鎖碧窗春曉。

臨江仙

深秋寒夜銀河靜，月明深院中庭。西窗幽夢等閒成。逡巡覺後，特地恨難平。紅燭半條殘燄短，依稀暗背銀屏。枕前何事最傷情。梧桐葉上，點點露珠零。

毛熙震

何滿子

寂寞芳菲暗度，歲華如箭堪驚。緬想舊歡多少事，轉添春思難平。曲檻絲垂金柳，小窗弦斷銀箏。

深院空聞燕語，滿園閑落花輕。一片相思休不得，
忍教長日愁生。誰見夕陽孤夢，覺來無限傷情！

浣溪沙

花榭香紅煙景迷，滿庭芳草綠萋萋，金鋪閑掩繡簾
低。紫燕一雙嬌語碎，翠屏十二晚峯齊，夢魂消
散醉空闈。

菩薩蠻

梨花滿院飄香雪，高樓夜靜風箏咽。斜月照簾帷，
憶君和夢稀。小窗燈影背，燕語驚愁態。屏掩斷
香飛，行雲山外歸。

清平樂

春光欲暮，寂寞閑庭戶。粉蝶雙雙穿檻舞，簾卷晚
天疏雨。含愁獨倚閨幃，玉爐煙斷香微。正是銷
魂時節，東風滿院花飛。

更漏子

秋色清，河影淡，深戶燭寒光暗。綃幌碧，錦衾紅，
博山香炷融。更漏咽，蛩鳴切，滿院霜華如雪。
新月上，薄雲收，映簾懸玉鉤。

臨江仙

幽閨欲曙聞鶯轉，紅窗月影微明。好風頻謝落花

聲。隔幃殘燭，猶照綺屏箏。繡被錦茵眠玉燠。
炷香斜。嬾煙輕。澹蛾羞斂不勝情。暗思閑夢，何處
逐行雲？

李珣

南鄉子

煙漠漠，雨淒淒，岸花零落鷓鴣啼。遠客扁舟臨野
渡，思鄉處，潮退水平春色暮。

又

蘭橈舉，水文開，競攜藤籠采蓮來。回塘深處遙相

見，邀同宴，淥酒一卮紅上面。

又

歸路近，扣舷歌，采真珠處水風多。曲岸小橋山月過，煙深鎖，豆蔻花垂千萬朵。

又

乘綵舫，過蓮塘，櫂歌驚起睡鴛鴦。帶香遊女偎伴笑，爭窈窕，競折團荷遮晚照。

又

傾綠蟻，泛紅羸，閑邀女伴簇笙歌。避暑信船輕浪裏，閑遊戲，夾岸荔支紅蘸水。

又

雲帶雨，浪迎風，釣翁回櫂碧灣中。春酒香熟鱸魚美，誰同醉，纜卻扁舟篷底睡。

又

沙月靜，水煙輕，菱荷香裏夜船行。綠鬢紅臉誰家女，遙相顧，緩唱櫂歌極浦去。

又

漁市散，渡船稀，越南雲樹望中微。行客待潮天欲暮，迷春浦，愁聽猩猩噉瘴雨。

又

攏雲髻，背犀梳，焦紅衫映綠羅裾。越王臺下春風
暖，花盈岸，遊賞每邀鄰女伴。

又

相見處，晚晴天，刺桐花下越臺前。暗裏回眸深屬
意，遺雙翠，騎象背人先過水。

又

攜籠去，采菱歸，碧波風起雨霏霏。趁岸小船齊擢
急，羅衣溼，出向桃根樹下立。

又

雲髻重，葛衣輕，見人微笑亦多情。拾翠采珠能幾

許，來還去，爭及村居織機女。

又

登書舸，泛清波，采蓮時唱采蓮歌。攔櫂聲齊羅袖
斂，池光颭，驚起沙鷗八九點。

又

雙髻墜，小眉彎，笑隨女伴下春山。玉纖遙指花深
處，爭回顧，孔雀雙雙迎日舞。

又

山果熟，水花香，家家風景有池塘。木蘭舟上珠簾
卷，歌聲遠，椰子酒傾鸚鵡醅。

又

新月上，遠煙開，慣隨潮水采珠來。權穿花過歸溪口，酌春酒，小艇纜牽垂岸柳。

西溪子

金縷翠鈿浮動，妝罷小窗圓夢。日高時，春已老，人未到，滿地落花慵掃。無語倚屏風，泣殘紅。

酒泉子

秋雨連絲，聲散敗荷叢裏。那堪深夜枕前聽，酒初醒。牽愁惹思更無停，燭暗香凝天欲曙。細和煙，冷和雨，透簾旌。

浣溪沙

訪舊傷離欲斷魂，無因重見玉樓人，六街微雨鏤香塵。早爲不逢巫峽夢，那堪虛度錦江春，遇花傾酒莫辭頻。

又

紅藕花香到檻頻，可堪閑憶似花人，舊歡如夢絕音塵。翠疊畫屏山隱隱，冷鋪文簾水潐潐，斷魂何處一蟬新。

巫山一段雲

古廟依青嶂，行宮枕碧流。水聲山色鎖妝樓，往事

思悠悠。雲雨朝還暮，煙花春復秋。嗚援何必近
孤舟，行客自多愁。

菩薩蠻

回塘風起波文細，刺桐花裏門斜閉。殘日照平蕪，
雙雙飛鷓鴣。征帆何處客？相見還相隔。不語欲
魂銷，望中煙水遙。

又

隔簾微雨雙飛燕，砌花零落紅深淺。捻得寶箏調，
心隨征櫂遙。楚天雲外路，動使經年去。香斷畫
屏深，舊歡何處尋？

漁歌子

柳垂絲，花滿樹，鶯囀楚岸春天暮。櫂輕舟，出深浦，緩唱漁郎歸去。罷垂綸，還酌醕，孤村遙指雲遮處。下長汀，臨深渡，驚起一行沙鷺。

定風波

雁過秋空夜未央，隔窗煙月鎖蓮塘。往事豈堪容易想，惆悵，故人迢滯在瀟湘。縱有回文重疊意，誰寄？解鬟臨鏡泣殘妝。枕水香消金鴨冷，愁永，候蟲聲接杵聲長。

又

簾外煙和月滿庭，此時閑坐若爲情。小閣擁爐殘酒醒，愁聽，寒風葉落一聲聲。惟恨玉人芳信阻，雲雨，屏帷寂寞夢難成。斗轉更闌心杳杳，將曉，銀釭斜照綺琴橫。

歐陽炯

南歌子

錦帳銀燈影，紗窗玉漏聲，迢迢永夜夢難成。愁對小庭秋色，月空明。

西江月

月映長江秋水，分明冷浸星河。淺沙汀上白雲多，
雪散幾叢蘆葦。扁舟倒影寒潭，煙光遠罩輕波。
笛聲何處響漁歌，兩岸蘋香暗起。

更漏子

三十六宮秋夜永，露華點滴高梧。丁丁玉漏咽銅壺，
明月上金鋪。紅綫毯，博山爐，香風暗觸流蘇。
羊車一去長青蕪，鏡塵鸞綵孤。

三字令

春欲盡，日遲遲，牡丹時。羅幌卷，翠簾垂。彩牋
書，紅粉淚，兩心知。人不在，燕空歸，負佳期。

香燼落，枕函敲，月分明。花澹薄，惹相思。

南鄉子

嫩草如煙，石榴花發海南天。日暮江亭春影淡，鴛鴦浴，水遠山長看不足。

又

畫舸停橈，槿花籬外竹橫橋。水上遊人沙上女，回顧，笑指芭蕉林裏住。

又

岸遠沙平，日斜歸路晚霞明。孔雀自憐金翠尾，臨水，認得行人驚不起。

又

洞口誰家，木蘭船繫木蘭花。紅袖女郎相引去，遊南浦，笑倚春風相對語。

江城子

晚日金陵岸草平，落霞明，水無情。六代繁華，暗逐逝波聲。空有姑蘇臺上月，如西子鏡照江城。

歐陽彬

生查子

竟日畫堂歡，入夜重開宴。翦燭蠟煙香，促席花光

顛。待得月華來，滿院如鋪練。門外簇驂騮，直待更深散。

閩選

定風波

江水沈沈帆影過，游魚到晚透寒波。渡口雙雙飛白鳥，煙嫋，蘆花深處隱漁歌。扁舟短櫂歸蘭浦，人去。蕭蕭竹徑透青莎。深夜無風新雨歇，涼月，露迎珠顆入圓荷。

孫光憲

浣溪沙

蓼岸風多橘柚香，江邊一望楚天長，片帆煙際閃孤光。
目送征鴻飛杳杳，思隨流水去茫茫，蘭紅波碧憶瀟湘。

又

花漸凋疏不耐風，畫簾垂地晚堂空，墮階綵薛舞愁紅。
膩粉半黏金鬢子，殘香猶煖繡薰籠，蕙心無處與人同。

又

輕打銀箏墜燕泥，斷絲高罨畫樓西，花冠閑上午牀
曉。粉籀半開新竹徑，紅苞盡落舊桃蹊，不堪終
日閉深闈。

河傳

花落，煙薄，謝家池閣，寂寞春深。翠蛾輕斂意沈
吟，露襟，無人知此心。玉爐香斷霜灰冷，簾鋪影，
梁燕歸紅杏。晚來天，空悄然，孤眠枕檀雲鬢偏。

菩薩蠻

花冠頻鼓牆頭翼，東方澹白連窗色。門外早鶯聲，

背樓殘月明。薄寒籠醉態，依舊鉛華在。握手送人歸，半捻金縷衣。

後庭花

石城依舊空江國，故宮春色。七尺青絲芳草綠，絕世難得。玉英凋落盡，更何人識？野棠如織。只是教人添怨憶，悵望無極。

酒泉子

空磧無邊，萬里陽關道路。馬蕭蕭，人去去，隴雲愁。香貂舊製戎衣窄，胡霜千里白。綺羅心，魂夢隔，上高樓。

又

曲檻小樓，正是鶯花三月。思無慘，愁欲絕，鬱離襟。展屏空對瀟湘水，眼前千萬里。淚掩紅，眉斂翠，恨沈沈。

清平樂

等閑無語，春恨如何去？終是疏狂留不住，花暗柳濃何處。盡日日斷魂飛，晚窗斜界殘暉。長恨朱門薄暮，繡鞍驄馬空歸。

風流子

茅舍槿籬溪曲，雞犬自南自北。菰葉長，水荇開，

門外春波漲淥。聽織聲促，軋軋鳴梭穿屋。

又

金絡玉銜嘶馬，繫向綠楊陰下。朱戶掩，繡簾垂，
曲院水流花謝。歡罷歸也，猶在九衢深夜。

定西番

帝子枕前秋夜，霜幄冷，月華明，正三更。何處
戍樓寒笛，夢殘聞一聲。遙想漢關萬里，淚縱橫！

八拍蠻

孔雀尾拖金綫長，怕人飛起入丁香。越女沙頭爭拾
翠，相呼歸去背斜陽。

謁金門

留不得，留得也應無益。白紵春衫如雪色，揚州初去日。輕別離，甘拋擲，江上滿帆風疾。卻羨綵鴛三十六，孤鸞還一隻。

思越人

古臺平，芳草遠，館娃宮外春深。翠黛空留千載恨，教人何處相尋？綺羅無復當時事，露花點滴香淚。惆悵遙天橫淥水，鴛鴦對對飛起。

又

渚蓮枯，宮樹老，長州廢苑蕭條。想像玉人空處

所，月明獨上溪橋。經春初敗秋風起，紅蘭綠蕙
愁死。一片風流傷心地，魂銷目斷西子。

望梅花

數枝開與短牆平，見雪萼紅跗相映。引起誰人邊塞
情？簾外欲三更，吹斷離愁月正明，空聽隔江聲。

張泌

浣溪沙

鈿轂香車過柳隄，樺煙分處馬頻嘶，爲他沈醉不成
泥。花滿驛亭香露細，杜鵑聲斷玉蟾低，含情無

語倚樓西。

又

馬上凝情憶舊遊，照花淹竹小溪流，鈿箏羅幕玉搔頭。早是出門長帶月，可堪分袂又經秋，晚風斜日不勝愁。

又

翡翠屏開繡幄紅，謝娥無力曉妝慵，錦帷鴛被宿香濃。微雨小庭春寂寞，燕飛鶯語隔簾櫳，杏花凝恨倚東風。

臨江仙

煙收湘渚秋江靜，蕉花露泣愁紅。五雲雙鶴去無蹤，幾回魂斷，凝望向長空。翠竹暗留珠淚怨，閑調寶瑟波中。花鬢月鬢綠雲重，古祠深殿，香冷雨和風。

河傳

渺莽雲水，惆悵暮帆，去程迢遞。夕陽芳草，千里萬里，雁聲無限起。夢魂悄斷煙波裏，心如醉，相見何處是？錦屏香冷無睡，被頭多少淚。

酒泉子

紫陌青門，三十六宮春色。御溝輦路暗相通，杏園

風。咸陽沽酒寶釵空，笑指未央歸去。插花走馬
落殘紅，月明中。

南歌子

柳色遮樓暗，桐花落砌香。畫堂開處遠風涼。高卷
水精簾額，襯斜陽。

又

岸柳拖煙綠，庭花照日紅。數聲蜀魄入簾櫳。驚斷
碧窗殘夢，畫屏空。

又

錦薦紅鸂鶒，羅衣繡鳳凰。綺疏飄雪北風狂。簾幕

盡垂無事，鬱金香。

河瀆神

古樹噪寒鴉，滿庭楓葉蘆花。晝燈當午隔輕紗，晝
閣珠簾影斜。門外往來祈賽客，翩翩帆落天涯。
回首隔江煙火，渡頭三兩人家。

馮延巳

三臺令

春色春色，依舊青門紫陌。日斜柳暗花嫣，醉臥春
色少年。年少，年少，行樂直須及早。

又

明月明月，照得離人愁絕。更深影入空牀，不道帷屏夜長。長夜，長夜，夢到庭花陰下。

又

南浦南浦，翠鬢離人何處？常時攜手高樓，依舊樓前水流。流水，流水，中有傷心雙淚。

歸國謠

何處笛？深夜夢回情脈脈，竹風簷雨寒窗隔。離人幾歲無消息，今頭白，不眠特地重相憶。

又

江水碧，江上何人吹玉笛？扁舟遠送瀟湘客。蘆
花千里霜月白，傷行色，來朝便是關山隔。

長相思

紅滿枝，綠滿枝，宿雨厭厭睡起遲，閑庭花影移。
憶歸期，數歸期，夢見雖多相見稀，相逢知幾時？

拋毬樂

酒罷歌餘興未闌，小橋清水共盤桓。波搖梅蕊傷心
白，風入羅衣貼體寒。且莫思歸去，須盡笙歌此夕
歡。

又

逐勝歸來雨未晴，樓前風重草煙輕。谷鶯語軟花邊過，水調聲長醉裏聽。款舉金觥勸，誰是當筵最有情？

又

梅落新春入後庭，眼前風物可無情。曲池波晚冰還合，芳草迎船綠未成。且上高樓望，相共凭闌看月生。

又

霜積秋山萬樹紅，倚巖樓上挂朱櫳。白雲天遠重重恨，黃葉煙深淅淅風。髣髴梁州曲，吹在誰家玉笛

中？

又

盡日登高興未殘，紅樓人散獨盤桓。一鉤冷霧懸珠箔，滿面西風凭玉闌。歸去須沈醉，小院新池月乍寒。

又

坐對高樓千萬山，雁飛秋色滿闌干。燒殘紅燭暮雲合，飄盡碧梧金井寒。咫尺人千里，猶憶笙歌昨夜歡。

酒泉子

庭下花飛，月照妝樓春事晚。珠簾風，蘭燭燼，怨
空閑。迢迢何處寄相思？玉筯零零腸斷。屏幃深，
更漏水，夢魂迷。

又

芳草長川，柳映危橋橋下路。歸鴻飛，行人去，碧
山邊。風微煙淡雨蕭然，隔岸馬嘶何處？九回腸，
雙臉淚，夕陽天。

又

深院空幃，廊下風簾驚宿燕。香印灰，蘭燭燼，覺
來時。月明人自擣寒衣，剛愛無端惆悵。階前行，

闌外立，欲雞噉。

采桑子

小庭雨過春將盡，片片花飛。獨折殘枝，無語凭闌祇自知。玉堂香暖珠簾卷，雙燕來歸。君約佳期，肯信韶華得幾時。

又

馬嘶人語春風岸，芳草綿綿，楊柳橋邊，落日高樓酒旆懸。舊愁新恨知多少？目斷遙天，獨立花前，更聽笙歌滿畫船。

又

西風半夜簾櫳冷，遠夢初歸，夢過金屏，花謝窗前
夜合枝。
昭陽殿裏新翻曲，未有人知。偷取笙吹，
驚覺寒蛩到曉噉。

又

小堂深靜無人到，深院春風。惆悵牆東，一樹櫻桃
帶雨紅。愁心似醉兼如病，欲語還慵。日暮疏鐘，
雙燕歸樓畫閣中。

又

畫堂燈煖簾櫳卷，禁漏丁丁。雨罷寒生，一夜西窗
夢不成。玉娥重起添香印，回倚孤屏，不語含情，

水調何人吹笛聲。

又

笙歌放散人歸去，獨宿江樓。月上雲收，一半珠簾挂玉鉤。起來檢點經遊地，處處新愁。憑仗東流，將取離心過橘州。

又

畫堂昨夜愁無睡，風雨淒淒。林鶻爭棲，落盡燈花雞未曉。年光往事如流水，休說情迷。玉筯雙垂，祇是金籠鸚鵡知。

又

洞房深夜笙歌散，簾幕重重，斜月朦朧，雨過殘花落地紅。昔年無限傷心事，依舊東風。獨倚梧桐，閑想閑思到曉鐘。

又

花前失卻遊春侶，極目尋芳。滿眼悲涼，縱有笙歌亦斷腸。林間戲蝶簾間燕，各自雙雙。忍更思量，綠樹青苔半夕陽。

菩薩蠻

金波遠逐行雲去，疏星時作銀河渡。花影臥秋千，更長人不眠。玉箏彈未徹，鳳髻黃釵脫。憶夢翠

蛾低，微風吹繡衣。

又

畫堂昨夜西風過，繡簾時拂朱門鎖。驚夢不成雲，
雙蛾枕上顰。金爐煙嫋嫋，燭暗紗窗曉。殘日尙
彎環，玉箏和淚彈。

又

梅花吹入誰家笛？行雲半夜凝空碧。敲枕不成眠，
關山人未還。聲隨幽怨絕，空斷澄霜月。月影下
重簷，輕風花滿簾。

又

回廊遠砌生秋草，夢魂千里青門道。鸚鵡怨長更，
碧籠金鎖橫。羅幃中夜起，霜月清如水。玉露不
成圓，寶箏悲斷弦。

又

嬌鬢堆枕釵橫鳳，溶溶春水楊花夢。紅燭淚闌干，
翠屏煙浪寒。錦壺催畫箭，玉佩天涯遠。和淚試
嚴妝，落梅飛夜霜。

又

西風嫋嫋凌歌扇，秋期正與行雲遠。花葉脫霜紅，
流螢殘月中。蘭閨人在否？千里重樓暮。翠被已

銷香，夢隨寒漏長。

又

沈沈朱戶橫金鎖，紗窗月影隨風過。燭淚欲闌干，
落梅生晚寒。寶釵橫翠鳳，千里香屏夢。雲雨已
荒涼，江南春草長。

又

敲鬟墮髻搖雙槳，采蓮晚出清江上。顧影約流萍，
楚歌嬌未成。相逢顰翠黛，笑把珠璫解。家住柳
陰中，畫橋東復東。

謁金門

風乍起，吹皺一池春水。閑引鴛鴦芳徑裏，手按紅杏藥。門鴨闌干獨倚，碧玉搔頭斜墜。終日望君君不至，舉頭聞鵲喜。

又

楊柳陌，寶馬嘶空無跡。新著荷衣人未識，年年江海客。夢覺巫山春色，醉眼飛花狼藉。起舞不辭無氣力，愛君吹玉笛。

清平樂

雨晴煙晚，綠水新池滿。雙燕飛來垂柳院，小閣畫簾高卷。黃昏獨倚朱闌，西南新月眉彎。砌下落

花風起，羅衣特地春寒。

更漏子

風帶寒，枝正好，蘭蕙無端先老。情悄悄，夢依依，離人猶未歸。 褰羅幕，凭朱閣，不獨堪悲搖落。月東出，雁南飛，誰家夜擣衣？

又

夜初長，人近別，夢覺一窗殘月。鸚鵡臥，蟋蟀鳴，西風寒未成。 紅蠟燭，彈棋局，牀上畫屏山綠。 塞繡幌，倚瑤琴，前歡淚滴襟。

喜遷鶯

宿鶯囀，鄉夢斷，春樹曉朦朧。殘燈和燼閉朱櫺，
人語隔屏風。香已寒，燈已絕，忽憶去年離別。
石城花雨倚江樓，波上木蘭舟。

又

霧濛濛，風淅淅，楊柳帶疏煙。飄飄輕絮滿南園，
牆下草芊緜。燕初飛，鶯已老，拂面春風長好。
相逢攜酒且高歌，人生得幾何？

阮郎歸

南園春半踏青時，風和聞馬嘶。青梅如豆柳如絲，
日長蝴蝶飛。花露重，草煙低，人家簾幕垂。鞦韆

纏慵困解羅衣，畫梁雙燕棲。

又

角聲吹斷隴梅枝，孤窗月影低。塞鴻無限欲驚飛，
城烏休夜嘯。尋斷夢，掩深閨，行人去路迷，門
前楊柳綠陰齊。——何時聞馬嘶？

芳草渡

梧桐落，蓼花秋，煙初冷，雨纔收。蕭條風物正堪
愁。人去後，多少恨，在心頭？燕鴻遠，羌笛怨，
渺渺澄波一片。山如黛，月如鉤，笙歌散，夢魂斷，
倚高樓。

虞美人

玉鉤鸞柱調鸚鵡，宛轉留春語。雲屏冷落畫堂空，
薄晚春寒，無奈落花風。 峯簾燕子低飛去，拂鏡
塵鸞舞。不知今夜月眉彎，誰佩同心雙結倚闌干？

臨江仙

冷紅飄起桃花片，青春意緒闌珊。高樓簾幕卷輕
寒。酒餘人散，獨自倚闌干。 夕陽千里連芳草，
風光愁殺王孫。徘徊飛盡碧天雲。鳳城何處？明月
照黃昏。

蝶戀花

窗外寒雞天欲曙，香印成灰，坐起暉無緒。庭際高
梧凝宿霧，卷簾雙鵲驚飛去。屏上羅衣閑繡縷。
一晌關情，憶遍江南路。夜夜夢魂休謾語，已知前
事無情處。

又

蕭索清秋珠淚墜，枕簟微涼，展輕渾無寐。殘酒欲
醒中夜起，月明如練天如水。階下寒聲唳絡緯，
庭樹金風，悄悄重門閉。可惜舊觀攜手地，思量一
夕成憔悴。

又

幾度鳳樓同飲宴，此夕相逢，卻勝當時見。低語前歡頻轉面，雙眉斂恨春山遠。蠟燭淚流羌笛怨，偷整羅衣，欲唱情猶嬾。醉裏不辭金爵滿，陽關一曲腸千斷。

又

幾日行雲何處去？忘了歸來，不道春將暮。百草千花寒食路，香車繫在誰家樹？淚眼倚樓頻獨語，雙燕飛來，陌上相逢否？撩亂春愁如柳絮，悠悠夢裏無尋處。

又

六曲闌干偎碧樹，楊柳風輕，展盡黃金縷。誰把鈿
箏移玉柱，穿簾海燕雙飛去。滿眼遊絲兼落絮，
紅杏開時，一霎清明雨。濃醉覺來鶯亂語，驚殘好
夢無尋處。

又

誰道閑情拋棄久？每到春來，惆悵還依舊。日日花
前常病酒，不辭鏡裏朱顏瘦。河畔青蕪隄上柳，
爲問新愁，何事年年有？獨立小樓風滿袖，平林新
月人歸後。

思越人

酒醒情懷惡，金縷褪玉肌如削。寒食過卻，海棠零落。乍倚遍闌干，煙淡薄。翠幕簾櫳，畫閣，春睡著，覺來失鞦韆期約。

上行杯

落梅暑雨消殘粉，雲重煙深寒食近。羅幕遮香，柳外鞦韆出畫牆。春山顛倒釵橫鳳，飛絮入簾春睡重。夢裏佳期，祇許庭花與月知。

徐昌圖

臨江仙

飲散離亭西去，浮生常恨飄蓬。回頭煙柳漸重重。
淡雲孤雁遠，寒日暮天紅。今夜畫船何處？潮平
淮月朦朧。酒醒人靜奈愁濃。殘燈孤枕夢，輕浪五
更風。

呂巖

梧桐影

落日斜，秋風冷，今夜故人來不來？教人立盡梧桐
影！

耿玉真

菩薩蠻

玉京人去秋蕭索，畫簷鵲起梧桐落。敲枕悄無言，
月和殘夢圓。背燈唯暗泣，甚處砧聲急？眉黛遠
山攢，芭蕉生暮寒。

無名氏

後庭宴

千里故鄉，十年華屋，亂魂飛過屏山簇。眼重眉褪

不勝春，菱花知我銷香玉。雙雙燕子歸來，應解
笑人幽獨。斷歌零舞，遺恨清江曲。萬樹綠低迷，
一庭紅擗簌。

魚遊春水

秦樓東風裏，燕子還來尋舊壘。餘寒猶峭，紅日薄
侵羅綺。嫩草方抽碧玉茵，媚柳輕轉黃金縷。鶯窸
上林，魚遊春水。幾曲闌干遍倚，又是一番新桃
李。佳人應怪歸遲，梅妝淚洗。鳳簫聲絕沈孤雁，
望斷清波無雙鯉。雲山萬重，寸心千里。